

四庫全書

子部

欽定四庫全書

山堂肆考卷五十三

明 彭大翼 撰

臣職

總東宮官

朱子語錄唐六典載東宮官制甚詳如一小朝廷置詹事以統衆務猶朝廷之尚書也置左右二春坊以領衆局猶朝廷之中書門下省也左右二春坊皆設官屬又各帥其屬之意也崇文館猶朝廷之館閣贊

善大夫猶朝廷之諫議大夫其官職一視朝廷而為  
隆殺也今之東宮官極苟簡左右春坊舊制選賢德  
者為之今遂用武弁之小有才者其次惟有講讀數  
員而已如贊善大夫又但為階官非實有職業神宗  
以唐六典改官制當時亦有不曾討論者如東宮官  
屬之不備是也又會要太師太傅太保少師少傅少  
保賓客詹事左右庶子中允中舍諭德贊善洗馬家  
令率更令皆緣舊制除授而無職司惟建儲闡即置

三少賓客詹事庶子諭德中舍二人並以他官兼充其左右春坊並鐫印置吏員

審道觀德

禮文王世子凡三王教世子必以禮樂立太傅少傅以養之欲知父子君臣之道太傅審父子君臣之道以示之少傅奉世子以觀太傅之德行太傅在前少傅在後入則有保出則有師是以教喻而德成也

立草書真

傅暢晉公卿禮秩太傅立草少傅書真以為儲訓

太公為傅

文王使太公傅太子發發嗜鮑魚望曰鮑魚不登于俎  
安有以非禮之物養太子哉

召公為保

賈誼上疏曰昔者成王幼在襁抱召公為太保周公為  
太傅太公為太師保保其身體傅傳其德義師導之教  
訓此三公之職也

皆選端士

賈誼上書王者于太子皆選天下端士有道術者使與居處故太子生而見正事聞正言行正道左右前後皆正人也

不親外家

漢地節中許伯使其弟中郎將舜監護太子家疏廣曰太子國之儲副其師友必天下英俊不宜獨親外家許史

正言

宋樓機字彥發謚忠簡為資善堂小學教授時皇太子為惠國公機日陳正道正言及累朝事親脩身治國愛民四事手書以獻置之左右朝夕省覽

秀望

記室新書陸機陸雲以南土秀望遷太子舍人

號為夫子

斛斯正字士亮精三禮周武帝為皇太子服青襟受學

于正號為夫子儒者榮之

謂之儒宗

唐王元感為四門博士詔曰元感性質溫敏博聞彊記  
荷前達之識究先聖之旨是謂儒宗可授太子司議郎  
兼崇文館學士

承慶作箴

唐韋承慶為太子賢司議郎儀鳳中詔太子監國太子  
頗近聲色承慶上書諫又為善諭箴以獻太子善之



徐浩為誥

唐徐浩玄宗時為太子司議即肅宗即位詔令多出其  
手及玄宗傳位誥冊皆浩為之

三卿

家令率更令及太子僕正為太子三卿

三師

唐三師三少官不必備唯其人無其人則闕之太師太  
傅太保為三師少師少傅少保為三少

徐陵宮體

東海徐陵父摛為太子左衛率陵及子儉並為抄撰學士父子東宮恩寵莫比陵儉文並綺艷故時號宮體為後進模範

高允國書

北魏高允字伯恭事魏為太子師魏主太平真君朝使與崔浩同脩國史浩刊石立于郊壇東方所書魏先世事列于衢路北人無不忿恚共譖浩暴揚國惡魏主大

怒使有司按浩等罪狀太子召允謂曰吾自尊卿至尊有問但依吾語太子入言高允小心慎密且制由崔浩請赦其罪魏主問允曰國書皆浩所為乎對曰浩所領事多總裁而已至于著述臣多于浩帝怒曰允罪甚于浩何以得生太子曰天威嚴重允小臣迷亂失次耳帝問信如東宮所言乎對曰臣罪當族滅不敢虛妄殿下哀臣欲勾其生耳帝顧謂太子曰直哉此人情所難遂赦之詔誅浩夷其族他日太子讓允曰吾欲為卿脫死

而卿終不從每念之使人心悸允曰吾與浩實同其事  
死生榮辱義無獨殊誠荷殿下再造之恩違心苟免非  
臣所願也太子動容稱嘆允退謂人曰我不奉東宮指  
導者恐負翟黑子故也按遼東翟黑子奉使并州受布  
千匹事覺謀于高允允曰公惟幄寵臣有罪首實庶或  
見原崔鑑曰首實罪不可惻不如諱之黑子怨允曰君  
柰何誘人就死地遂不以實對魏主殺之

以宰相兼

唐貞觀以還太子師傅皆宰相兼領其餘宮僚亦甚重焉  
以宗臣選

唐李大亮拜左衛大將軍後晉王為皇太子東宮僚屬  
皆盛選宗臣又以大亮兼太子右衛率儀兼工部尚書  
身居三職宿衛兩宮甚為親信大亮每當直必通宵假  
寐太宗勞之曰當公宿直我便安卧

諫用舞靴

宋神宗就邸英宗命韓魏公擇宮僚公薦用王陶韓維

等皆厚德之士也一日內侍以宮樣靴進維曰王安用  
舞靴神宗亟令毀之維嘗引疾請郡將去王府採漢東  
平樂善之語為贊以獻慈聖垂簾諭宰相曰諸王仁孝  
日聞皆卿等擇宮臣所致召至中書褒諭

### 諫習鞠戲

宋陳俊卿在普安郡王邸一日王習毬鞠之戲公取韓  
愈諫封建書以諷王王即為誦全文不遺一字公退而  
喜曰王聰明而樂諫社稷之福也

講論語

北史沈重字子厚授露門博士仍於露臺為皇太子講  
論語

進渾儀

樓攻媿集黃裳為嘉王府翊善因王誕日乃作渾天儀  
以獻更為歌詩以勉王進學如天而不息也

君實重名

宋仁宗諭執政曰延安郡王出閣當議宮僚執政對曰

司馬光有重名宜為郡王羽翼如呂公著孫覺皆可任之

范冲極選

宋趙鼎請以行宮新作書院為資善堂命建國公瑗聽讀且薦徽猷閣待制范冲兼太子翊善起居即朱震蕪贊讀朝論二人極天下之選帝命瑗見之皆設拜按瑗孝宗御諱也

賢德宜訪



唐太宗謂羣臣曰公等宜搜訪賢德以輔儲宮

謹厚可為

宋晏元獻公殊為館職時天下無事許臣僚擇勝飲宴  
公貧甚不能出獨家居與昆弟講習一日選東宮官忽  
中批除晏殊執政莫諭所因次日進呈上諭曰近聞館  
閣臣僚無不嬉遊戲賞惟殊杜門與兄弟讀書如此謹  
厚真可為東宮官公既受命上面諭除授之意公曰臣  
非不樂燕遊者直以貧無可為之具上益嘉其誠實知

事君體由是眷注日深

太子太師

銀章青綬

漢輿服志太子太師太傅太保古官也銀章青綬佩水  
蒼玉

金墀銀祭

唐許敬除太子太師制晨謁金墀事切于忠蹇夜隨銀  
祭義先于調護

同三品

唐職林長孫無忌為太子太師同中書門下三品同三品自此始

長庶僚

唐孫逖行信安王禕太子太師制傅道元子帥長庶僚宜優天秩之崇俾極宮臣之位

擁全承乾

唐太子承乾與魏王泰交惡帝曰當今忠蹇無踰魏徵

我遣傅太子以慰天下之望羽翼固矣即拜太子太師  
徵以疾辭詔答曰漢太子以四皓為助我賴公其義一  
也公雖卧病可擁全之

往諭希烈

唐顏真卿改太子太師李希烈叛陷汝州盧杞乃建言  
真卿為四方所信若往諭之可不勞師而定李勉以為  
一失元老反貽朝廷羞密表固留真卿答曰君命可避  
乎遂往既見希烈時朱滔王武俊田悅李納使者皆在

坐謂希烈曰聞太師名德久矣公欲建大號而太師適  
至求宰相孰先太師者真卿叱曰若等聞顏常山否吾  
兄也祿山反首舉義師後雖被執詬賊不絕口吾年且  
八十官太師吾守吾節死而後已豈受若等脅耶諸賊  
失色

太子太傅

審道

見太師

獻箴

齊王攸為太子太傅獻箴于太子曰保相之材必擇賢

明

位次太常

漢高祖九年以叔孫通為太子太傅位次太常

位視尚書

梁置太子太傅一人位視尚書令

皆推石奮

漢石奮在孝文時恭謹無比太子太傅缺選可傅者皆推奮為太子太傅奮子慶循行孝謹元狩元年立太子選羣臣可傅者慶自沛守為太子太傅

即拜張佚

東漢明帝始立為皇太子光武詔問誰可傅太子者羣臣皆言陰識可博士張佚曰今陛下立太子為陰氏乎為天下乎即為陰氏則陰侯可為天下則固宜用天下之賢才帝曰欲置傅者以輔太子也今博士不難正朕

况太子乎即拜佚為太子太傅桓榮為少傅

太子奉觴

漢疏廣為太子太傅兄子受為少傅宣帝置酒為宴太子躬奉觴以為壽上甚嘉之

太后為服

漢夏侯勝為太子太傅受詔撰論語年九十卒太后為勝素服五日報師傅之恩儒者以為榮

願乞骸骨



漢疏廣疏受在位五歲皇太子年十二通論語孝經廣  
謂受曰吾聞知足不辱知止不殆今仕至二千石宦成  
名立如此不去懼有後悔即日上疏乞骸骨上許之賜  
黃金二十斤公卿故人設祖道供帳送者車數百兩道  
路觀者皆曰賢哉二大夫廣字仲翁受字公子一說廣  
受為父子一說受為廣兄元之子乃叔姪也

不朝朔望

漢故事太子太傅少傅不朝朔望

不領屬

東漢太子太傅一人中二千石職掌輔導太子禮如師  
不領官屬少傅二千石悉主太子官屬

不稱臣

魏太傅于太子不稱臣少傅稱臣

以名臣拜

東漢明帝以鄧禹先朝名臣拜太傅

以將軍領

晉王充以驍騎大將軍領太子太傅

賀循儒宗

晉賀循字彥先為太子太傅朝廷初建凡有疑義及宗廟制度皆循所定朝野以為一時儒宗

士廉朝望

唐太宗伐高麗高士廉攝太子太傅仍典朝政皇太子下令云攝太傅申國公士廉朝望國華儀刑攸屬寡人忝膺監守實資訓導

琢磨以道

應劭漢官儀太子太傅日就月將琢磨玉質言太子有如玉之質當琢磨以道

占對有倫

吳張溫少修節操孫權聞其名問羣臣曰溫當今誰與為比顧雍曰當今無輩及召見占對有倫觀者傾悚權改容加禮拜議郎選曹尚書尋授太子太傅

願守慈儉

唐趙宗儒太和中為太子太傅文宗詔訪政理對曰堯舜之化慈儉而已願陛下守之帝納其言

私讓田園

唐于志寧為太子太傅常與右僕射張行成俱蒙賜第宅田園志寧奏曰臣居闕右代襲箕裘周魏以來基址不墜行成等新營莊宅尚少田園於臣有餘乞申私讓迎崇賢門

張勃晉東宮舊事皇太子見二傅執弟子禮二傅入見

太子太子詣崇賢門迎之太傅拜太子合答拜入坐對坐

講宣武堂

晉山濤為太傅侍講于宣武堂乘步輦以導太子

太子太保

身翼太子

文王世子保也者謹其身以輔翼之而歸諸道者也

德導太子

唐蕭瑀為太子太保太宗曰三師以德導太子者也禮不尊則無所取法

以開府加

王隱晉書劉寔字子真以特進開府加太子太保

以特進行

晉懷帝以荀組為侍中特進行太子太保事

直臣

後魏顯祖將禪位于京兆王子推陸馥抗言曰皇太子

聖德承基四海屬望臣請列頸殿廷有死無二久之帝  
意解語曰馥直臣也其能保吾子乎遂以為太保

舊相

宋王溥乾德二年罷為太子太保故事一品班于臺省  
之後太祖因見溥曰溥舊相當寵異之即令分臺省班  
于東西

太子少師

託孤



唐李綱為太子少師為陳父子君臣之道問寢視膳之方聽者忘倦太子嘗商確古來君臣忠節之事綱凜然曰託六尺之孤寄百里之命古以為難綱以為易每吐論發言辭色慨慷有不可奪之志太子未嘗不聳然禮待

崇讓

唐房玄齡為太子少師時皇太子將行拜禮備禮以待之玄齡厚自卑損不敢修謁識者重其崇讓或云是姚

崇事

議選蕭俛

唐文宗議選舊德保護東宮乃召蕭俛為太子少師

詔選玄齡

唐貞觀中房玄齡為少師玄齡遜謝詔不許太宗因謂侍臣曰太子師保古難其選

分給院錢

唐王起改太子少師起治生無檢所得祿賜為童婢所

盜貧不能自存帝詔曰益仙韶院錢議者謂與玩臣分  
給可耻也起賴其入不克遜

特賜步輿

唐李綱拜太子少師綱有脚疾太宗特賜步輿令乘至  
閣下數引至禁中問以政道

出奉黃瓠

後魏郭祚領太子少師從世宗幸東宮明帝幼弱持以  
黃瓠出奉之時謗祚者號為黃瓠少師按博雅瓠瓜屬

也

入乘小馬

許敬宗為太子少師乾封初以年老不能步行特令朝日乘小馬入禁門至內省

太子少傅

卧傅

漢高祖謂張良曰子房雖疾彊卧傅太子時叔通已為太傅良行少傅事

恭訓

晉周顛拜太子少傅上疏曰臣學不通一經智不效一官乃欲使臣內管銓衡外叅傳訓質輕蟬翼事重千鈞比之不可不待議而明矣

賜輜車

東漢博士桓榮字春卿光武以榮為太子莊少傅詔賜輜車乘馬榮大會諸生陳其車馬印綬曰今日所蒙稽古之力也可不勉哉

乘小輦

晉山濤為太子少傅拜太子求退帝賜小輦乘之以訓太子

閒雅

疏受為太子少傅辭理閒雅

正直

東觀漢記王丹為太子少傅蹇蹇正直又名德重于當時

履道

山濤轉太子少傅詔曰秉德冲素心思潜通清虛履道  
有古人之風

尚義

山公啓事皇太子始之東宮四海屬望保傅之官不可  
不高天下之選少傅羊祜秉德尚義克己復禮甄字清  
淨又尚年少可久于其事也

準古不拜

晉何曾議太子少傅于太子當稱臣拜苟顛曰太與少  
乃二傅之名次耳非于太子有輕重也詔曰秦漢以來  
舊章廢滅隨時改作不可依用宜準古義遂定議二傅  
不拜又晉武帝時有司奏東宮二傅禮儀不同帝曰崇  
敬師傅所以尊教何論臣與不臣其令太子拜之

以老乞辭

唐張行成拜左僕射太子少傅永徽四年三月不雨至  
五月行成懼以老乞身制答曰古者策免三公殊乖罪



已之義朕寡德所致非宰相咎也乃賜宮女黃金器物  
勅勿復辭行成固請去

朔望

見太傅

賓友相接

南史王儉拜太子少傅朝議太子接少傅以賓友之禮  
據經以對

漢匡衡為太子少傅數上書陳便宜朝廷有大事則據

經以對

作箴以警言

晉傅立為太子少傅乃作少傅箴云正人在側德義盈  
堂鮑肆先入蘭臺不芳傅臣司計敢告君王又後魏蕭  
圓為太子少傅亦有箴云愛惜日力寸陰毋棄親膳再  
飯寢門三至小心翼翼大孝烝烝詢謀計慮問對疑丞  
安樂必敬毋忘戰兢

太子少保

直士

唐李綱兼太子詹事頻乞骸骨高祖慢罵之曰建成在東宮遣卿輔導何為屢致辭乎綱頓首陳謝曰陛下功成業泰頗事矜伐臣事太子所懷鄙見復不採納不去何為高祖謝曰知公直士勉弼我兒于是擢太子少保上書太子曰綱備位保傅冀得一效愚鄙殿下飲酒過量非養生道凡為太子務孝謹以慰上心不宜聽受邪說與生蒸間太子不懌

名臣

李綱為太子少保高祖以其隋氏名臣甚加優禮手勅未嘗稱名其見重如此

以右相除

唐李適之為右相李林甫密奏其好酒頗妨政事玄宗惑焉乃除太子少保適之遽命親故歡會賦詩曰避賢初罷相樂聖且銜盃為問門前客今朝幾個來舉朝服其度量

以輔臣領

宋天禧四年以資政殿大學士王欽若為司空職如故  
蓋欽若先以輔臣兼領東宮三少品序非便有表換秩  
故有是命

太子賓客

晉愍懷太子在東宮選人臣子弟有名稱者以為賓  
友則太子賓客之名疑自此始

授經

唐鄭肅以開成二年詔拜吏部侍郎以肅常侍太子言論甚正復令兼太子賓客為東宮授經既而太子失寵上有廢斥意肅召見備陳天下大本不可輕動上改容嘉之

### 贊禮

宋至道元年尚書左丞李至禮部侍郎李沆並兼太子賓客見皇太子如師傅之禮上召謂至等曰太子仁孝賢明今立為儲貳當須正人輔之卿等可盡心調護若

動皆用禮必須贊成若事稍有未當不當隨順至於詩書禮樂之道可以裨益太子者卿等素習不假朕多訓也

慢官斥居

唐將作監王堪坐治太廟不謹改太子賓客李固言上還制書曰陛下當用名臣左右太子堪以慢官斥居調護之任恐非所宜

國公召拜

唐武攸緒中宗初降封巢國公至是上遣杜謹盈齋書以安車召拜太子賓客苦祈還山詔可之

調護春闈

白居易行趙昌太子賓客制夫望優四皓然後能調護春闈

召對滋福

宋仁宗為太子時李文定公迪兼太子賓客真宗一日召對滋福殿欲相之迪固辭俄太子出謝曰蒙恩以賓



客為宰相真宗固謂迪曰尚可辭耶乃拜吏部侍郎兼太子太傅同中書門下平章事

專贊禮儀

唐太子賓客四人正三品專掌侍從規諫贊相禮儀宴會則上齒

互陪侍講

宋仁宗初為皇太子宰相丁謂馮拯兼少師少傅樞使曹利用兼少保參政王曾樞副錢惟演兼賓客謂等因

請師傅十日一赴資善堂賓客以下隻日互陪侍講學  
上從之

唐以宰相領

唐貞觀十八年以宰相兼賓客開元中定員四人

宋以執政兼

宋天禧四年參政任中正樞副錢惟演參政王曾並兼  
太子賓客執政兼東宮自此始

全柔氣象

卷五十三  
柳子厚先友記元全柔河南人氣象甚偉好以德報怨  
入為太子賓客

皇甫威儀

同上皇甫取河南人有威儀由浙東廉使為太子賓客  
柳宗元曰先君之所與友凡天下善士舉集焉信讓而  
大顯道博而無雜今之世言交者以為法敢悉書所尤  
厚者附茲石以銘于背

山堂肆考卷五十三

欽定四庫全書

子部

山堂肆考卷五十五

詳校官中書臣孫溶

主事臣祁韻士覆勘

總校官降調編修臣倉聖脉

校對官主事臣陳 墉

謄錄監生臣金 特

欽定四庫全書

山堂肆考卷五十四

明

彭大翼 撰

臣職

太子詹事

歷代沿革詹事秦官也應劭曰詹省也給也秩二千

石漢因之掌太子家位在長秋上文帝以鄭當時為

景帝詹事景帝即位以竇嬰為詹事昭帝以韋賢為

詹事成帝鴻嘉三年至東漢俱省太子官屬悉屬少

傳魏復置晉咸寧初用黃門侍郎楊珧為詹事掌東宮之任齊置府領官屬後魏有太子左右詹事北齊東宮衆事無小大皆統之唐置詹事府詹事一人正三品少詹事一人正四品上掌統三事十率府之政及內外衆務糾彈非違總判府事置少詹以貳之龍朔中改為端尹少尹咸通復舊垂拱改宮尹神龍復舊宋東宮官有詹事仁宗升儲置詹事二人神宗欽宗升儲並置二人多以他官兼充從三品少詹事正

六品及即位亦省之元置太子詹事從三品掌知東宮內外香務統領判院事詹事從四品掌貳詹事

服絳

晉詹事品第三銀章青綬絳朝服兩梁冠

衣錦

唐張行成轉太子少詹事太宗征東太子于定州監國即行成本鄉太宗謂行成曰送公衣錦還鄉于是令有司祀其先人墓

王恭學問

晉王恭有學問清操過人武帝以為太陽尹領太子詹事恭讓表曰今日皇儲始建四方是式總司之任崇替所由宜妙選賢才盡一時之勝

江總才華

陳後主在東宮時欲以江總為詹事孔奐曰江總有潘陸之才而無園綺之實輔弼儲副竊非所宜後主乃自言于宣帝帝將許之奐復奏曰江總文華之人今皇太



子文華不少無藉于總願選敦重之士以居輔導帝曰誰可與曰都官尚書王廓代有士德可以居之後主時在側曰廓乃王泰之子不可為太子詹事與人曰宋朝范曄即范泰之子亦為太子詹事後主固爭之宣帝遂以總為詹事

孔霸授經

漢書宣帝時孔霸以經授太子為詹事

姚珽上書

姚珽遷詹事節愍太子稍失道珽凡四上書諫中宗嘉歎焉

以貴戚為

漢竇嬰為太后兄子景帝時為詹事

以將軍領

晉謝琰征羌有功為輔國將軍領太子詹事

為舅求官

唐張說女嫁盧氏嘗為舅盧公求官候父下朝而問焉

父不語但指搯牀龜而示之女歸告其夫曰舅已得詹事矣

為兄代職

鄭鏜字利用為太子詹事鏜卒弟代為詹事

長史屈除

唐太宗轉李勣太子詹事謂曰我兒新登儲貳鄉故長史故有此除雖屈階資可勿怪也按兒指高宗也

侍讀就無

宋周必大辭免兼太子詹事奏狀儲端華重今昔所同  
漢韋賢質朴篤學始膺委任唐李世勣舊府長史屈階  
資而為之近歲以來非老成端諒為世所推則必于近  
臣中擇嘗任王府侍讀及宮僚者就兼是職苟或異此  
寧虛厥官

弼諧審諭

唐李綱為太子詹事太子嘗出遊有進魚者太子使膾  
之唐儉趙元鼎自言其能太子曰操刀膾腥調和鼎味

公等善之若弼諧審諭則屬綱矣

斷裁彈肅

唐大詔令李寬太子詹事冊博望斷裁之規輿情僉屬承華彈肅之寄任賢斯在

太子春坊

北齊始有門下坊左庶子領之典書坊右庶子領之隋門下坊置左庶子典書坊置右庶子

左坊

唐龍朔中改門下坊曰左春坊其左庶子中允司議郎左諭德左贊善大夫崇文館學士校書郎洗馬文學校書正字等隸焉

右坊

典書坊改為右春坊其右庶子中舍人右諭德右贊善大夫太子通事舍人家令率更令等隸焉

用內臣

宋建儲闈即置春坊官仁宗神宗並以內臣為左右春

坊勾當左右春坊事孝宗乾道元年立皇太子置左右春坊二員同左右春坊二員

用武弁

見總東宮

領局

北齊門下坊領藥藏局有監丞各二人侍藥四人隋門下坊領藥藏局有監丞各一人侍藥四人

備案

胡文恭行趙沐春坊制備儲坊之案

太子庶子

周禮諸子掌國子之倅國有大事則帥國子而致于太子唯所用之諸子即庶子也秦置中庶子以蒙恬為之漢庶子為太子少傅屬官東漢員五人晉有中庶子庶子各四人劉宋中庶子與功高中舍人一人共掌坊之政令庶子掌侍從左右與功高通事舍人一人共掌坊之禁令隋有左右庶子唐龍朔中左右



庶子改左右中護左掌侍從贊相駁正啟奏右掌侍  
從獻納啟奏糾正違闕儼相威儀宋有左右庶子不  
常設每建儲則隨宜置官以備察察多以他官兼領  
乾道中庶子諭德除左不除右七年詔庶子諭德輪  
日入宮

通詩

漢馮野王通詩以父任為太子中庶子年十八上書願  
試守長安令

授經

漢歐陽地餘為中庶子授皇太子經

稱肅敬

漢王商字子威為太子中庶子以肅敬見稱

美文辭

曹操留少子植守鄴以邢顛為家丞顛防閑以禮無所  
屈撓由是不合庶子劉楨美文辭植親愛之楨曰君侯  
採庶子之春華忘家丞之秋實為上招謗其罪不小愚

實懼焉

鮑勛高節

魏鮑勛清白有高節以此知名嘗為中庶子在東宮正色不撓

仲堪清言

晉殷仲堪能清言善屬文武帝召為太子中庶子甚見親愛

諫好騎射

蜀後主立太子璿以霍戈為中庶子太子好騎射戈援引古義盡言規諫得切磋之體

諷虧禮度

唐于志寧為右庶子以太子承乾數虧禮度撰諫苑二十卷諷之太宗大悅

侍臣箴

晉溫嶠為中庶子獻侍臣箴甚見補益

時政疏

唐高季輔事見賞賜

宜稱陪臣

晉鄭默為太子中庶子朝廷以太子官屬宜稱陪臣默  
上言宮臣受命天朝不得同藩國之事

不為弄臣

隋劉行本為左庶子太子嘗得良乘令行本乘之行本  
正色曰至尊致臣於庶子之位者欲令輔導殿下以正  
道非殿下弄臣太子慙而止

自比倡優

隋太子勇宴宮臣左庶子唐令則自請奏琵琶又歌斌媚娘之曲太子洗馬李綱白太子勇曰令則身任宮卿職當調護乃於宴坐自比倡優請正其罪

不納賄賂

唐錢徽為左庶子時韓武以賄賂結公卿遺徽二十萬不納時稱有公望

克脩宮政

唐柳宗元為柳渾相國行狀拜右庶子奉翼儲宮克脩  
宮政

多識朝儀

唐肅宗在東宮時孔演為中庶子經學該博多識舊典  
朝儀

篤學好古

晉武帝咸寧元年詔皇甫謐沈靜朴素篤學好古其以  
謐為太子中庶子

端居守道

唐趙宗儒罷相為右庶子端居守道遷吏部侍郎召見勞之曰知卿間關六年故有此拜

宜用雋選

吳孫登為太子時太傅張溫言于上曰中庶子官最清密切問近對宜用雋選于是乃用陳長為中庶子

諫忽高班

唐太子承乾左右多任閹宦庶子于志寧曰易牙敗齊



趙高亡秦張讓傾漢殿下皆用寺人輕忽高班凌轢貴任品命失序紀綱不立太子不悅

久留王瑒

陳書王瑒父冲嘗為瑒辭領中庶子文帝謂冲曰所以久留瑒于承華者正欲使太子微有瑒風耳

特召陶伉

陶氏家傳陶伉遷中庶子上謂伉曰君少好學善談玄理尤明詩易以孝聞于時儲選實難其人特召君耳

班同三舍

唐休璟自夏官尚書授左庶子制宜輟五曹之務俾同  
三舍之班按三舍班言與侍中中書侍郎班次同也

職授八舍

環濟要略職授八舍言庶子為八舍之職也

請降墨勅

唐崔神基轉太子右庶子時突厥使者入朝有司移文  
召太子神基諫曰今太子非朝朔望而別喚者請降墨

敕由是詔神基與詹事更日侍讀東宮

與典機劇

唐許敬宗高宗為太子時遷右庶子後太子監國定州敬宗與高士廉與典機密又宋晏殊為左庶子真宗每有咨訪多以方寸小紙細書問之由是公得參與機密凡有所對必以藁進示不洩也

以宰相兼為

唐宋璟以宰相兼太子庶子

以太守參選

晉主以中庶子闕宜得俊茂者欲以濟陰太守劉儀陽  
城太守石崇參選

俾尹宮坊

唐姜公輔左庶子制

宜為宮職

齊書袁粲言于帝曰臣觀張緒有正始遺風宜為宮職  
後轉中庶子

衛太子家

漢班彪戕國家故事選公卿子孫衛太子家命為中庶子

佐太子德

唐杜正倫遷太子庶子帝詔正倫曰吾兒幼弱未及就德我嘗遇物戒之故輟卿于朝以佐太子

諫議兼右

宋仁宗為太子日張士遜遷右諫議大夫兼右庶子又

為賓客

府判兼左

宋真宗為開封尹時妙選僚屬召楊徽之為府判官兼左庶子

太子諭德

歷代沿革唐龍朔中置左右諭德各一人掌侍從贊諭職擬常侍宋東宮官有左右諭德建儲則置否則闕仁宗神宗升儲皆置二人並他官充乾道中置一

人惟除左不除右

清班優秩

白集元稹制東宮之有諭德猶上臺之有騎省清班優秩所選非輕

直道昌言

文選詩句直道侍太子昌言沃宸聰

掌贊道德

唐諭德正四品掌諭皇太子以道德隨事諷贊

合知典故

唐德宗拜崔苒為諭德苒對東宮曰臣不識朝廷典故見殿下合稱臣否東宮曰卿是東寮自合知也

忠實見奇

宋仁宗在東宮魯質肅公宗道為諭德一日真宗召公使者及門而公不在移時乃在肆中飲歸中使遽先入白乃與公約曰上若怪公來遲當託何事公曰但以實告中使曰然則得罪奈何公曰飲酒人之常情欺君臣



之大罪中使嗟嘆而去真宗果問使者具如公對自此  
上奇公以為忠實可大用

信順致頌

宋天禧中仁宗在東宮時故太傅鄧國公張文懿公諱  
士遜為太子諭德上親書寅亮天地弼予一人日新其  
德十二字以賜之公曾孫假承務郎臣欽臣以屬翰林  
學士臣蘇軾為之頌二篇其一曰於皇仁宗恭已無為  
以天為心以臣為師其相鄧公履信思順天下頌之以

退為進嗚呼休哉寅亮天地弼予一人其二曰惟一故  
新惟新故一一故不流新故無斁伊尹暨湯咸有一德  
周雖舊邦嗚呼休哉日新其德

以記室為

宋楊礪字汝礪真宗為襄王時以礪為記室王甚重之  
及建東宮以礪為太子右諭德真宗即位召為翰林學  
士

以參軍擢

宋陳薦字彥升神宗為潁王時薦為王府記室叅軍及升儲擢為諭德

傳令

已下中允

唐置左贊善大夫正五品上掌傳令諷過失贊禮儀以教授諸郡王至龍朔二年其傳令等事乃改太子中允為之

累資

舊制太子中允惟老于幕官者累資方至近歲州縣進

用者多除中允遂有冷中允熱中允之謠

太子侍讀侍講

唐太宗為晉王始有侍講開元初十王宅引學士教書始有侍讀

儒素見稱

晉王紹宗遷秘書少監仍侍太子讀書紹宗性澹雅以儒素見稱在廷之士咸敬慕之

簡淡自悼

唐薛令之為東宮侍讀時宮僚簡淡作詩自悼朝日上  
團團照見先生盤盤中何所有苜蓿長闌干飯澁匙難  
進羹稀筋易寬只可謀朝夕何由保歲寒玄宗幸東宮  
見之續曰咏木喙距長鳳皇毛羽短若嫌松桂寒任逐  
桑榆暖令之因謝病東歸

謀好刻薄

晉庾亮風格峻整善談老莊元帝器重之聘其妹為太  
子紹妃使亮侍講東宮帝好刑名家以韓非子賜太子

亮諫曰申韓刻薄傷化不足留聖心太子納之按太子即晉明帝也

諫事晏安

唐文宗朝太子侍讀韋溫晨詣少陽院見莊恪太子日中乃得見因諫曰太子當學周文王雞鳴而起問安視膳不宜專事晏安太子不能用其言溫乃辭侍讀

風格高峻

唐李元敬博覽羣書高宗在東宮馬周啟薦之召入崇

文館兼領侍讀仍借御書讀之風格高峻有不可犯之色

辭氣激切

唐呂元英遷同州刺史及中謝論奏辭氣激切上謂宰相曰呂元英有讜言直氣宜留給事左右仍兼太子侍讀

公著作訓

唐丁公著充太子侍讀作宮訓十卷穆宗即位遷工部

侍郎以春宮之舊也

歸登作箴

唐歸登有文學為東宮侍讀作龍樓箴以諷太子

造輿

唐褚無量為侍讀年老為造腰輿令內給使扶上便殿

題笏

唐王起文宗時為太子侍讀帝題詩于太子笏以賜起  
又詔畫起像于便殿號當世仲尼



講經

唐蕭德言講授經史尤精左氏春秋晚年篤志于學每展閱五經必盥濯束帶危坐對之高宗為晉王時詔德言講經授業及升春宮仍兼侍讀

撰記

唐玄宗在春宮褚無量兼侍讀嘗撰翼善記以進之  
進義纂

唐許叔牙少精毛詩禮記貞觀初累授晉王文學兼侍

讀高宗升東宮遷太子洗馬仍兼侍讀嘗進毛詩纂義十卷皇太子賜帛二百段令寫本付司經局

納軌物

唐憲宗曰凡講讀者當以經義輔導太子納之軌物

恩顧無比

唐徐岱字處仁充皇太子及舒王侍讀承兩宮恩顧時無與比

親敬尤深

唐玄宗在春宮張說褚無量俱為侍讀深見親敬

詔入長生院

唐陳夷行充翰林學士兼皇太子侍讀詔五日一入長生院侍太子讀經

就聘嵩高山

唐孔述睿孤隱于嵩高山德宗以諫議大夫玄纁采帛就此山以禮聘述睿既至召見便殿以為皇太子侍讀特賜廐馬第宅

學問操履

宋孝宗謂輔臣曰古人以孝子為重其事見于文王世子須當多置僚屬博選忠良使左右前後罔匪正人一薛居州無益也又問舊來官屬幾人虞允文等奏詹事二人庶子諭德兼講讀者二人上曰今宜增置二員誰可當此任者允文奏李彥穎劉焯二人上曰焯有學問穎有操履二人皆好遂以為侍讀

忠義剛直

宋楊長儒奏狀先臣楊萬里以忠義剛正受知孝宗皇帝淳熙間御筆親擢先臣為侍講凡先臣有所陳奏嘉納如流

太子洗馬

洗馬前驅也國語越勾踐為吳王夫差洗馬

秩如謁者

漢置洗馬員十六人秩如謁者

局準秘書

晉太子詹事屬官有洗馬八人掌皇太子圖籍經書職如謁者局準秘書品第七班同舍人下絳朝服進賢一梁冠黑介幘劉宋齊梁至北齊俱置隋門下坊置司經局唐龍朔二年改為太子司經大夫咸亨復舊神龍改司經局曰桂坊罷隸左春坊領崇文館三年改司經大夫曰桂坊大夫糾正違失掌經史子集四庫圖籍刊緝之事立正本副本以備供進

朝推文士

白六帖朝推文士選在陸機蓋機起家為太子洗馬也  
時號玉人

晉衛玠為太子洗馬時號為玉人

才望充職

南史梁庾於陵天監中拜太子洗馬舊制東宮官屬通  
為清選近代用人皆取甲族及有才望者時於陵與周  
捨並充此職武帝曰官人以清豈限甲族時論美之

文雅登朝

荀邃字道玄拜太子洗馬戴若思特見欽重作詩頌之  
序曰洗馬荀道玄累葉重光才無文雅所以弱冠登朝  
章奏共推

晉江統字應元召補洗馬每有疑滯大事章表奏議為  
同官所推常為之作草

墳籍博覽

南史裴松之博覽墳籍立身簡素宋武帝克洛陽松之  
居州行事帝曰松之廊廟才不宜久居邊郡召為太子



洗馬

太子家令

家令秦官也屬詹事東漢屬少傅張晏曰太子稱家  
故令曰家令

職比廷尉

漢太子食湯沐邑十縣家令主之東漢家令秩千石主  
倉庫飲食職比廷尉晉家令品第五銅印墨綬進賢兩  
梁冠絳朝服宋齊清流皆不為之隋煬帝改為司府令

唐改為家令寺龍朔中又改宮府寺家令為宮府大夫  
職似司農

漢百官志太子家令主倉穀飲食職似司農少府

家號智囊

漢晁錯上書文帝拜為太子家令以辯得幸太子太子  
家號曰智囊

詔稱忠心

晉武帝詔曰太子家令陸亮有忠心可補吏部郎

每諫出遊

蜀志後主為太子譙周為家令後主頗出遊觀增廣聲樂周每上疏極諫

特被親遇

齊惠太子入居東宮沈約為步兵校尉管書記時宮中多士而約特被親遇每旦入見日影斜方出尋遷太子家令

春坊學文體

梁徐摛屬文好新奇不拘舊體為太子家令兼管書記  
文體既別春坊盡學之宮體之號自此而起

婢師識官名

沈約嘗侍宴梁武帝有婢妓師是齊惠文太子宫人  
帝問識座中客否對曰為沈家令約伏地流涕宮人  
亦悲為之罷酒

山堂肆考卷五十四